

22 FEB 2001

Filipina-hubungan/ (Analisis berita)

HUBUNGAN MALAYSIA-FILIPINA KIAN MESRA SEMULA

MANILA, 22 Feb (Bernama) -- Hubungan Malaysia-Filipina yang mengalami turun naik sejak beberapa tahun lalu sekarang menunjukkan kemesraan semula.

Bagi kali pertama dalam tempoh tiga tahun, Malaysia menghantar delegasi untuk memperbaiki hubungan perdagangan dua hala dan pelaburan, yang sebelum ini telah menjunam ke paras terendah.

Diketuai oleh Menteri Perdagangan Antarabangsa dan Industri Datuk Seri Rafidah Aziz, misi itu akan berada di Manila dari 7 hingga 10 Mac bagi mencari dan mendapatkan peluang perniagaan dengan ahli perniagaan Filipina.

Majlis Perniagaan Filipina-Malaysia dan Dewan Perniagaan dan Industri Filipina (PCCI) bersama-sama menjadi tuan rumah misi itu.

"Kami amat gembira Malaysia membuat pandangan baru terhadap peluang perniagaan di Filipina memandangkan sekarang kita mempunyai kerajaan yang baru," kata presiden PCCI Miguel Varela.

Malaysia adalah antara pelabur terbesar di Filipina semasa pemerintahan presiden Fidel Ramos, yang mempunyai hubungan rapat dengan Perdana Menteri Datuk Seri Dr Mahathir Mohamad.

Hong Leong, Renong, Ekran, Berjaya, Kuok dan Petronas adalah antara sektor koporat yang mempunyai pelaburan dalam bidang pembuatan, hartanah, pengangkutan dan yang berkaitan.

Apabila Joseph Estrada menggantikan Ramos pada 1998, hubungan dua hala mula terjejas. Ramos diberikan pujian kerana menghidupkan semula perdagangan dan pelaburan antara kedua-dua rakan kongsi Asean itu.

Ulasan sokongan Estrada terhadap bekas timbalan perdana menteri yang dipecat Datuk Seri Anwar Ibrahim tidak menyenangkan Kuala Lumpur, ia dianggap sebagai campur tangan dalam hal ehwal dalaman Malaysia. Beliau juga membuat ulasan berkaitan dakwaan Manila berkaitan tuntutan negara itu terhadap Sabah. Tiba-tiba pelaburan Malaysia di negara itu menjadi kering.

Seperti "kawan baiknya" Anwar, Estrada juga berkemungkinan dipenjarakan. Beliau menghadapi kes mahkamah yang tidak boleh dijamin.

Tetapi sejak Gloria Arroyo menjadi presiden 20 Jan lepas, tanda-tanda menunjukkan kebangkitan hubungan baik antara Malaysia dan Filipina.

Dr Mahathir adalah antara pemimpin asing yang pertama memberikan ucapan tahniah kepada Arroyo apabila menggantikan Estrada yang digulingkan berikutan tunjuk-tunjuk perasaan yang disokong tentera.

Beliau menghantar anaknya Marina ke Manila untuk menemui Arroyo, suatu pertemuan yang dilihat oleh penganalisis politik sebagai perkembangan positif bagi kedua-dua negara.

Arroyo berkata isu Sabah dan isu lain yang menimbulkan perbalahan seharusnya tidak membuatkan hubungan antara Filipina dan Malaysia tegang.

"Ini adalah pendapat saya dan ini juga adalah pendapat Perdana Menteri Malaysia Mahathir Mohamad," katanya.

-- BERNAMA

ALJ AU RI